



Forum per cultura da pasch

■ **(fmr/cdm) La jamna vargada ei l'uniun «forum per cultura da pasch» vegni da fundada a Glion. La Casa Sentupada dallas soras dominicanas duei daventar in center da pasch.** Per quei intent ein tschun representantas dallas soras dominicanas a Glion e treis persunas dil fatg externas sentupadas il venderdis vargau. Sper fundar il «forum per cultura da pasch» han ellas gest lantschau la «Stad da Glion (Ilanzer Sommer)». Durent entginas jamnas da stad cun differentas occurrenzas, vegn il forum a sededicar alla lavur da pasch.

Engaschi per la pasch

Sco las soras dominicanas scrivan en in communicau als mieds da massa, vegn la pasch en general definida sco stadi salutar da ruas e silenzi, sco l'absenza da disturbis ni malruasseivladad ed oravontut da conflicts. Pasch seigi denton era ina tenuta generala da persunas, gruppaziuns, interpresas ni entiras tiaras. Avon treis onns han las soras dominicanas da Glion iniziàu la lavur da pasch cul focus sin «pasch e senn dalla veta». Cun agid d'in team specialisau han ellas elavurau il concept dil forum. «Per nus sco cuminonza dominicana eis ei ina missiun zun impurtanta e digna da s'engaschar per la pasch», ha sora *Annemarie Müller*, la priura generala dalla Claustra da Glion declarau en siu plaid da beinvegna a caschun dalla fundaziun dil «forum per

cultura da pasch». Ella selegrì sillas activitads che stettien avon porta.

Stad da Glion

Gia igl uost 2021 duei igl emprum forum haver liug el rom digl «Ilanzer Sommer». Seminaris da plirs dis porschan spazi per scolaziun, inscunters, communicaziun ed encuraschament. Ils seminaris sco era l'uniun sedrezzan a carstgauns ed organizaziuns che vulan s'engaschar activamein per la lavur da pasch. Tenor las soras dominicanas vegnan organizaziuns da pasch ch'eiin gia activas en Svizra envidadas da daventar commembras dil forum per aschia puder rinforzar a liunga vesta la lavur che promova la pasch.

Center da pasch

A Glion duei quei dar in center da pasch. «Communablamein accordein nus igl engaschi global, naziunal e persunal, aschia ch'ìls differentes scalems pon serinforzar vicendeivlamein», declaran las fundaturas ed ils fundaturs dall'uniun lur finamira. Sin palancau internaziunal duei igl engaschi svizzer per la pasch vegnir rinforzaus anoviars. Naziunal duei la cultura da pasch dalla Svizra vegnir tgirada ed en special en Surselva duei la generaziun giuvna vegnir sensibilisada per la lavur da pasch. La Casa Sentupada – la casa da seminaris e scolaziun dallas soras dominicanas a Glion – duei vegnir rinforzada e daventar in center da pasch.



La Casa Sentupada dalle soras dominicanas duei daventar in center da pasch. FOTO MAD